

**RIALACHÁN CUR CHUN FEIDHME (AE) 2022/788 ÓN gCOIMISIÚN**  
**an 16 Bealtaine 2022**  
**maidir le haicmiú earraí áirithe san Ainmníocht Chomhcheangailte**

TÁ AN COIMISIÚN EORPACH,

Ag féachaint don Chonradh ar Fheidhmiú an Aontais Eorpaigh,

Ag féachaint do Rialachán (AE) Uimh. 952/2013 ó Pharlaimint na hEorpa agus ón gComhairle an 9 Deireadh Fómhair 2013 lena leagtar síos Cód Custaim an Aontais <sup>(1)</sup>, agus go háirithe Airteagal 57(4) agus Airteagal 58(2) de,

De bharr an mhéid seo a leanas:

- (1) Chun a áirithiú go gcuirtear an Ainmníocht Chomhcheangailte atá i gceangal le Rialachán (CEE) Uimh. 2658/87 ón gComhairle <sup>(2)</sup> i bhfeidhm go haonfhoirmeach, is gá bearta a ghlacadh maidir le haicmiú na n-earraí dá dtagraítear san Iarscríbhinn a ghabhann leis an Rialachán seo.
- (2) Le Rialachán (CEE) Uimh. 2658/87, leagadh síos na rialacha ginearálta maidir le léirmhíniú na hAinmníochta Comhcheangailte. Tá feidhm ag na rialacha sin freisin maidir le haon ainmníocht eile atá bunaithe go hiomlán uirthi nó a bhfuil cuid di bunaithe uirthi nó a chuireann aon fhoroinn bhreise léi agus a bhunaítear le forálacha sonracha de chuid an Aontais, d'fhonn bearta taraife agus bearta eile i ndáil le trádáil in earraí a chur i bhfeidhm.
- (3) De bhun na rialacha ginearálta sin, na hearraí a bhfuil tuairisc orthu i gcolún (1) den tábla a leagtar amach san Iarscríbhinn, is earraí iad ba cheart a aicmiú faoin gcód AC a luaitear i gcolún (2), de bhua na gcúiseanna a leagtar amach i gcolún (3) den tábla sin.
- (4) Maidir le faisnéis taraife cheangailteach arna heisiúint i leith na n-earraí a bhaineann leis an Rialachán seo, ar faisnéis í nach bhfuil i gcomhréir leis an Rialachán seo, is iomchuí a fhoráil go bhféadfaidh an sealbhóir an fhaisnéis sin a agairt fós, go ceann tréimhse áirithe, i gcomhréir le hAirteagal 34(9) de Rialachán (AE) Uimh. 952/2013. Is tréimhse 3 mhí ba cheart a bheith sa tréimhse sin.
- (5) Níor thug an Coiste um an gCód Custaim tuairim uaidh laistigh den teorainn ama a leag Cathaoirleach an Choiste síos,

TAR ÉIS AN RIALACHÁN SEO A GHLACADH:

*Airteagal 1*

Na hearraí a bhfuil tuairisc orthu i gcolún (1) den tábla a leagtar amach san Iarscríbhinn, aicmeofar iad faoi chuimsiú na hAinmníochta Comhcheangailte faoin gcód AC a luaitear i gcolún (2) den tábla sin.

*Airteagal 2*

Faisnéis taraife cheangailteach nach bhfuil i gcomhréir leis an Rialachán seo, féadfar í a agairt fós i gcomhréir le hAirteagal 34(9) de Rialachán (AE) Uimh. 952/2013 go ceann tréimhse 3 mhí ó dháta theacht i bhfeidhm an Rialacháin seo.

*Airteagal 3*

Tiocfaidh an Rialachán seo i bhfeidhm an fichiú lá tar éis lá a fhoilsithe in *Iris Oifigiúil an Aontais Eorpaigh*.

Beidh an Rialachán seo ina cheangal go huile agus go hiomlán agus beidh sé infheidhme go díreach i ngach Ballstát.

<sup>(1)</sup> IO L 269, 10.10.2013, lch. 1.

<sup>(2)</sup> Rialachán (CEE) Uimh. 2658/87 ón gComhairle an 23 Iúil 1987 maidir leis an ainmníocht taraife agus staidrimh agus leis an gComhtharaif Chustaim (IO L 256, 7.9.1987, lch. 1).

Arna dhéanamh sa Bhruiséil, 16 Bealtaine 2022.

*Thar ceann an Choimisiúin*  
Gerassimos THOMAS  
*An tArd-Stiúrthóir*  
*Ard-Stiúrthóireacht an Chánachais agus an Aontais*  
*Custaim*

---

## IARSCRÍBHINN

Tuairisc ar na hearraí	Aicmiú (Cód AC)	Cúiseanna
(1)	(2)	(3)
<p>Cithfholcadán, i bhfoirm tráidire chothrom, atá déanta as meascán de mhianraí agus de phlaistigh agus as bratú seachtrach plaisteach bán. Tá na comhábhair seo a leanas sa táirge, de réir meáchain:</p> <ul style="list-style-type: none"> <li>— cion 65 % de charbónáit chailciam;</li> <li>— cion 28 % de roisín poileistir;</li> <li>— cion 5 % de dhé-ocsaíd sileacain;</li> <li>— cion 2 % de ‘bhrat glóthaí’ poileistir (dromchla seachtrach).</li> </ul> <p>Is as scealpóga marmair, as grianchloch nó as eibhear mionbhrúite atá na comhábhair mhianracha (carbónáit chailciam agus dé-ocsaíd sileacain) déanta.</p> <p>Is éard atá i gceist leis an bpróiseas táirgthe an comhábhar mianrach a mheascadh le hábhar plaisteach (roisín poileistir) ar dtús. Ansin, doirtear an meascán sin isteach i múnla, múnla ar a bhfuil líneáil den “bhrat glóthaí” poileistir, agus mar chéim dheiridh leasaítear an roisín poileistir.</p> <p>Féach an íomhá (*).</p>	3922 10 00	<p>Cinntear an t-aicmiú le rialacha ginearálta 1, 3 (b) agus 6 maidir le léirmhíniú na hAinmníochta Comhcheangailte agus le foclaíocht chóid AC 3922 agus 3922 10 00.</p> <p>Ós rud é go gcumhdaíonn an bratú plaisteach dromchla inúsáidte an táirge, ní aithris ar chloch nádúrtha é an táirge. Dá bhrí sin, ní féidir é a mheas mar earra cloiche saorga faoi cheannteideal 6810 (féach freisin Nótaí Míniúcháin an Chórais Chomhchuíbhíthe a ghabhann le ceannteideal 6810, an tríú mír).</p> <p>Is é an t-ábhar plaisteach an comhábhar is tábhachtaí ó thaobh úsáid an táirge de. Tugann sé neart teanntachta, frithsheasmhacht in aghaidh ceimiceán agus neamh-thréscaoilteacht ar uisce don chithfholcadán, agus dá bhrí sin is é a thugann dó a shaintréith. Na mianraí atá sa chithfholcadán, feidhmíonn siad mar líonach.</p> <p>Dá thoradh sin, is faoi chód AC 3922 10 00 mar chithfholcadán plaisteach atá an táirge le haicmiú.</p>

(\*). Is le faisnéis a thabhairt, agus lena aghaidh sin amháin, atá an íomhá anseo.

